



§ 0.10

JORNAL da REPÚBLICA

PUBLICAÇÃO OFICIAL DA REPÚBLICA DEMOCRÁTICA DE TIMOR - LESTE

Número Extraordinário

SUMÁRIO

PRESIDENTE DA REPÚBLICA:

Dekretu Prezidente Repúblika número 31 /2020

Hosi loron 16 fulan-abril 1

DEKRETU PREZIDENTE REPÚBLIKA NÚMERU 31/2020

Hosi loron 16 fulan-abril

Uluk iha tempu susar durante prosesu Luta ba ukun-an, ema estranjeiru oiain mak fô kontributu ba ita-nia Luta liuhosi dalan oiain. Ohin loron iha prosesu dezvoltamentu nasionál, ema estranjeiru oiain mós fô sira-nia kontributu mai ita iha setór oiain. Ema estranjeiru ida ne'ebé hahú kedas hosi tinan 1998 mai hela iha Timor-Leste no hala'o ninia knaar iha setór saúde mak ita-nia amigu boot Doutor **Daniel John Murphy**. Ita-nia amigu Matebian ida-ne'e ninia obra boot ida ne'ebé mak fô ona tulun ba ema rihun ba rihun iha ita-nia rain ne'e mak Klínika Bairro Pité.

Doutor **Daniel John Murphy**. halo serbisu ho badinas nafatin hodi fô tulun ba ema moras rihun ba rihun durante ne'e. La'ós de'it fô tulun liuhosi tratamentu no ai-moruk iha ita-nia rai laran. Doutor ne'e mós ajuda ona ema oiain ba halo tratamentu iha rai liur, wainhira laiha possibilidade atu halo tratamentu iha rai laran.

Klínika Bairro Pit sai fatin mahon ba ema sira ne'ebé halerik tanba hetan moras iha sira-nia isin-lolon. Klínika ne'e nu'udar marka ida hosi obra boot ida ne'ebé mak ema estranjeiru ne'e hatudu ona ho determinasaun boot. Maske hasoru susar oiain, Doutor ne'e kontinua halo esforsu hodi buka dalan oiain atu nune'e Klínika ne'e bele eziste nafatin.

Ita hothotu iha devér atu rekoñese no valoriza dedikasaun no

kontributu boot hirak ne'ebé mak sidadaun estranjeiru ne'e hatudu ona mai ita hotu durante nia moris iha Timor-Leste.

Ohin Estadu no Nasaun tomak fô rekoñesimentu no valorizasaun, liuhosi kondekorasaun Orden Timor-Leste, ba knaar importante hirak ne'ebé mak Doutor **Daniel John Murphy** hala'o tiha ona.

Orden Timor-Leste mosu hosi Dekretu-Lei número 20/2009, loron 6 fulan-maiu, atu rekoñese ema estranjeiru ka sidadaun nasionál, ne'ebé mak liuhosi sira-nia atividade profesionál, sosial ka asaun espontánea ne'ebé nakonu ho korajen, fô ona kontributu boot ba Timor-Leste, ba Timoroan ka ba umanidade.

Nune'e, Prezidente Repúblika, liuhosi proposta Konsellu Agrasiamentu no Orden Onorífika nian, ne'ebé harii liuhosi Dekretu Prezidente Repúblika número 13/2013, loron 24 fulan-jullu, no bazeadu ba kompeténsia ne'ebé temi iha alínea j) hosi artigu 85 Konstituisaun Repúblika Demokrátika Timor-Leste, konjuga ho artigu 2, ho artigu 4, número 1, no mós ho artigu 5, alínea a), hosi Dekretu-Lei número 20/2009, loron 6 fulan-maiu, dekreta:

Kondekora, *a título póstumo*, Doutor **Daniel John Murphy** ho Medalla Orden Timor-Leste.

Tenke publika Dekretu ida ne'e.

Prezidente Repúblika

Francisco Guterres Lú Olo

Palásiu Prezidensial Nicolau Lobato, loron 16 fulan-abril tinan 2020